

Wednesday, March 26, 2025

Time - 2:30pm - 2:35pm

REGIONAL NEWS BULLETIN

(MIDDAY)

VIKSIT BHARAT YOUTH PARLIAMENT

Mizoram Youth Commission Chairman Pu Malsawmzuala Ralte chuan mahni party ni lo thiltih pawh ni se, mipuite tana tha tur a nih chuan lawmpuia fak mai a tha a ni a ti.

Wawiina Aizawl Vaivakawn venga Cultural Centre cum Auditorium hmuna Viksit Bharat Youth Parliament hawna hun a hmanpuinaah he thu hi sawiin Pu Malsawmzuala Ralte chuan ram rorelna ina thusawi dan hmanga inel tur thalaite chu mahni inthunun turin a fuih a. Mizoram mi an nih angin state hmasawna tura eng emaw tala tha thawhtu nih tum tur leh chumi a thlenna tur chuan tum nghet nei turin thalaite a chah a. Social media chu thil tangkai tak a nih thu leh engkim deuh thaw a awm thu a sawi a, hetihruah hian khawih chin tawh neih a ngaih thu leh a tangkai zawnga hman a pawimawh thu a sawi a ni.

Viksit Bharat Youth Parliament hawna inkhawmah hian Sports & Youth Services Secretary Pu Lalramsanga Sailo pawhin thu sawiin Viksit Bharat Youth Parliament chu kum 2019 atanga tan tawh a nih thu leh Prime Minister Pu Narendra Modi-a'n thalaite hmasawna tura a hmathlir zinga mi a nih thu a sawi a. Thalaiten India ram chu kum 2047-ah ram intodelh a nih theihna tura ngun taka an ngaihtuahna an sen theihna tura an fuankhawma a nih thu a sawi a. Pu Lalramsanga Sailo chuan Mizoram chu tun hnaiah ram pum huapa National Youth Parliament kaihhnawih programme hrang hrangah a che tha hle tih a sawi bawh a ni.

Hawna inkhawm hman hnuah hian State Level Youth Parliament Competition buatsaih chhunzawm a ni a. District hrang hrang atangin thalaiten intihsiakna hi an hmachhawn a ni.



ART & CULTURE MINISTER

Art & Culture Minister Pu C Lalsawivunga chuan Mizo thalai thil hlui zir leh chhui thin ten harsatna tam tak an tawh thin a ni a ti a.

He thu hi wawiina Dungtlang khuaa Thangchhuah Mual Lungphun hawna leh Lianchhiari leh Pasaltha Lalhmingliana Lungphunnaah sawiin Minister Pu C. Lalsawivunga chuan, Mizote History zia chu a dik lo tihna lam ni lovin a famkim tawh lo a ni, a ti a. History famkim zawk chu thlalaiten neih an duh a. Mizo ten History dik an neih theihna atan chuan sorkarin hma a lak nasat em em thu a sawi a. Nikum lama Art & Culture Dept leh HATIM Lunglei te chuan North Eastern Council Shillong atanga tanpuina an hmuh angin nikum November lam atangin Dungtlang hmun hlui leh thlan hlui te endikna hnathawh chu hmalak tan nghal a ni a. Kumin February ni 25 thleng khan Dungtlang Khaw hmun hlui a hmanlai thlan leh hmun hluite chu

Archaeological Survey of India (ASI) ten excavation an nei a ti a. Dungtlung thlanmual hlui a ruhro an laichhuah ang te chu Becca Laboratory Florida, USA-ah thawh a ni a. Nimin khan chung ruhro enfiah tura thawh thlak te result chu a chhuah thu leh ASI in an ruhro a laihchhuahte chu kum 1740 atanga kum 1800 AD chhung ami nia hriat a ni a ti.

DNA enfiah leh thil chi dang enfiah turin Birbal Sahni Institute of Palaeosciences, Lucknow ah ruhro sample test turin thawh thlak niin a result a chhuah vat beisei a ni a. Bel lei te, bel keh them, thir them sample ang chi te pawh chu nikum November khan phai lamah thawh thlak alo ni tawh thu a sawi bawh a ni.

Dungtlang Khaw hmun hluite chu khualzin mite tana tlawh theih a cheibawh tum a ni a ti a. Hemi hmalakna atana sum leh pai mamawh ang te chu hmuh ngei beisei a ni a ti bawh a ni.

Nikum December khan Dungtlang hmun hluiah hian Mizo hlang Archaeologists te chuan lei chhunga mihring sulhnu inphum (archaeological Survey) haichhuah hna hi an lo kalpui tawh bawh a ni.



SWAP & SAFE

Urban Development & Poverty Alleviation (UD&PA) Department bultumin, vawiin khan School Bungraw Inthleng Runpui (Swap & Safe) hawnna inkhawm chu Pu Cheemala Siva Gopal Reddy hoin a pisa kawtzawlah neih a ni.

Pu Cheemala Siva Gopal Reddy chuan zirlai naupang leh nu leh pa kal khawmte hnena lawmthu sawina a nei hmasa a. Zirlai bu, uniform leh zirna atana tangkai thei thil te paih mai lo a inthleng a nih dawn avangin, sum leh pai tam tak khawhral tur venna tha tak a ni, a ti. Zirlai naupang leh nu leh pate pawh zirlaibu leh uniform hlui an neihte tiral mai lo a, hetiang hun lo ngaichang thin turin a ngen a. Bawrhsap chuan School Bungraw inthleng runpui chu chin tha tak ni a ahriat thu sawiin, hmalam hunah pawh chhunzawm zel tlak a nih thu a tarlang. Ni thum chhung awh tur a nih angin Pu Cheemala Siva Gopal Reddy chuan zirlai naupang, nu leh pa tam zawk he hun lo chhim tura sawmin, hlawk taka hmang tangkai turin duhsakna a hlan nghal bawh.

School Bungraw inthleng runpuiah hian zirlaibu, uniform, pheikhawh leh zirna atana tangkai tur thil chu kenkhawm niin, mamawh neih ang angte a thlawn a lak theih a ni a, bungraw inthleng te chu fel fai taka chhinchhiah a ni.

School Bungraw inthleng runpui hi ni thum March ni 26 atanga ni 28 chhung hman tur niin, zing dar 10:00 atanga tlai lam dar 5:00 thlengin hun hman thin a ni ang.

